

熙朝新語

清

徐錫麟

著

第四冊

進步書局校印

新朝新語
PDG

熙朝新語卷十三

清 吳郡徐錫齡厚卿輯

乾隆三十六年。皇太后八旬萬壽。賜三班九老宴遊香山次日。命畫工艾啟蒙繪圖。文職九老。顯親王衍璜。恒親王崇志。大學士劉統勳。協辦大學士官保。吏部尚書託庸。戶部尚書素爾訥。刑部尚書楊廷璋。刑部侍郎吳紹詩。工部侍郎三和。武職九老。都統四格。曹瑞。散秩大臣國多歡。甘都。副都統伊崧阿。薩哈岱。李生輝。富僧阿。色瑞察。致仕九老。刑部尚書銜錢陳羣。內大臣福祿。禮部尚書陳惠華。兵部侍郎彭啟豐。禮部侍郎銜鄒一桂。副都御史呂熾。內閣學士陸宗楷。詹事府詹事陳浩。國子監司業銜王世芳。此 國家 崇禘之曠典。亦山靈未有之奇遭也。

乾隆十三年九月。上御集鳳軒。侍衛於大西門樓校射。上親發二十矢。中十九矢。有集鳳軒紀事詩勒石。齊 召南大西門觀 御射恭紀詩云。瞳矐初日照西山。百尺樓開紫翠間。御苑經寒欣草淺。秋風講武值農閒。虎熊的畫君臣鵠。鴻鷺墀分左右班。何幸此時叨侍從。大弓親覩 至尊彎。侍臣如堵並呼嵩。巧力分明不可同。容節中和 天子射。弛張高下 聖人弓。曾聞作賦誇雙兔。更說題詞數六熊。何似

我皇能百中。閒臨覆相教羣工。

御園十種蒲桃。一伏地公領孫。二伏地黑蒲桃。三伏地瑪瑙蒲桃。四哈密公領孫。五瑣瑣蒲桃。六哈密綠蒲桃。七哈密紅蒲桃。八哈密黑蒲桃。九哈密白蒲桃。十馬乳蒲桃。翰苑諸臣時蒙恩賜恭紀詩甚多。不及備錄。

康熙中。欽定古今圖書集成一萬卷。凡三十二典。曰乾象典。歲功典。歷法典。庶徵典。坤輿典。職方典。山川典。邊裔典。皇極典。宮闈典。官常典。家範典。交誼典。氏族典。人事典。閏媛典。藝術典。神異典。禽蟲典。草木典。經籍典。學行典。文學典。字學典。選舉典。銓衡典。食貨典。禮儀典。樂律典。戎政典。祥刑典。考工典。每典復分門類。共六千一百九部。計書五百二十函。又目錄二函。年久銅字殘缺過半。乾隆三十八年。易以木字。印四庫書應刊樣本。賜名聚珍板。有御製詩。

乾隆三十八年奉旨特開四庫全書館。翰林院為辦理處。武英殿為繕寫處。自殿板館書外。詔徵天下遺書。共一萬三千七百二十五種。舊存明代永樂大典殘缺幾半。命詞臣分類纂出整書八十五種。散片二百八十四種。分存書存目二項。纂輯提要。以該一書大旨按序輪進。書之佳者皆蒙御製題詞。以冠簡首。其四

部條目與前代稍異。經部十類曰易曰書曰詩曰禮曰春秋曰樂曰孝經曰四書曰
總經解曰小學。易類別卜筮入子部術數。禮類別歷代儀注入史部故事。樂類別宮
調絲竹譜。小學類別八法俱入子部藝術。史部十五類曰正史曰編年曰詔令奏議
曰別史曰雜史曰傳記曰史鈔曰載記曰故事曰時令曰地理曰職官曰政書曰目
錄曰史評。雜史類別瑣碎記錄入子部小說。雜家子部十四類曰儒家曰兵家曰法
家曰農家曰醫家曰天文算法曰術數曰藝術曰譜錄曰雜家曰類書曰小說曰釋
家曰道家。集部五類曰楚詞曰別集曰總集曰詩文評曰詞曲。其編錄敘次遵奉
諭旨。經首易注。史首史記。子首老子。集依時代。而聖祖世宗皇上御製集冠於

本朝集首。每庫繕寫四分。倣浙江范氏天一閣式。建文淵文源文津文溯四閣貯
之。並有御製記。又擇其精醇為薈要。計全書三之一。繕寫二分。一藏大內。一藏

圓明園。凡編錄十三年竣事。四庫共存書三千四百六十種。計七萬五千八百五十
四卷。輯簡明目錄。以便稽覽。底本仍貯翰林院內。此古今來未有之大觀也。

乾隆甲子。御製貢院詩。有從今不薄讀書人。言孔孟言大是難之句。一時士林傳
誦。為之感泣。張南華鵬翀和詩云。添得青袍多少淚。百年雨露萬年心。蓋紀實也。

乾隆二年 命易益國子監 大成殿屋瓦改用黃瓦乾隆三十年 欽頒禮器犧尊雷一紋壺一子爵一內言白一康侯鼎一盟簋一雷紋觚一召仲簋一素洗一犧首壘一皆周時法物 命陳設殿庭

乾隆五十年建 璧雍宮於國子監集賢門內宮四面出向周以環池有橋四前有碑亭二 是年二月上丁 高宗親行釋奠 臨雍講學舉行 盛典有 御製國學新建辟雍園水工成碑記 御製上丁釋奠後臨新建辟雍講學詩四首 御製三老五更說皆勒石諸臣皆有 聖主臨雍禮成恭紀詩

乾隆九年 詔編 內廷祕笈為天祿琳琅乾隆四十年重為補緝以經史子集為綱以宋金元明刊版朝代為次其一書而載數本用遂初堂書目例詳其題跋姓名收藏印記兼用鐵網珊瑚例至各冠 御題品評甲乙則自來冊府儲藏未聞斯盛矣襲封簡親王德沛貝子福存之子應襲封鎮國將軍讓與從子而已託疾入山讀書世宗朝 召見問所欲曰願得側身孔廟分特豚之饋 世宗重之授兵部侍郎高宗登極遷湖廣總督調任江南尋內擢尚書襲封簡親王常詣成均講大學橋門俯聽者千餘人皆悅服助教河間王仲穎之銳前曰猶未盡王請益曰自天子以

至於庶人一節。聖經畢矣。其本亂以下數語。乃重申之。以見吾儒所以異於二氏之義。王欣然揖謝。賢王之虛己好學。從可想見矣。

崑山朱以載厚章。天資超絕。五官並用。嘗於座間手錄孝子傳。而令二人左右隅坐。各操紙筆。口授令書。一成駢體序文。一成長律。已而各書竟。令座傳觀。詩文俱工。所錄孝子傳。精楷無一訛字。真奇才也。著有多師集。

丹徒余文圻京工詩植品。沈歸愚宗伯與訂車笠交。柏鄉魏念廷觀察愛其詩。欲令往見。文圻曰。往役義也。以詩為羔雁。非禮也。卒不往。以布衣終。著有江干詩鈔。

元和蔣震收曾榮。有至性。父子宣病。肢體卷曲。中夜含淚拊摩。跪中庭籲天求代。風露所侵。得濕氣病。又迎醫至數百里外。觸炎暑。犯霜雪。如是者數載。竟以瘵疾卒。士林以其少年死孝。咸惋惜焉。

錢唐諸生徐爾熾之配汪氏。年二十二。歸於徐。事舅姑。以孝聞。甫七月而夫卒。汪誓欲殉。維經者再。繩輒中斷。將自剄。小婢瞞知之。以告舅姑。亟救之。時汪已孕四五月矣。舅姑諭以宗祀為重。乃泣受命。閱五月。遺嗣維康生。及長。躬親課讀。維康有聲庠序。娶婦藍氏。七年。甫有娠。而維康遺疾。藍禱於神。請以身代。剡臂肉以和藥。卒罔效。

藍絕粒欲死。姑從容諭之曰。余延未亡之命。以至於今。為遺嗣故也。汝歸我家。七年未生子。今復有娠。若男也。則徐氏血食又綿延矣。語未竟。婦姑皆哭失聲。踰三月而生子。承恩家益落。藍養姑訓子。衣食膏火之資。盡給於十指間。因積勞成疾。汪六十歲卒。守節四十四年。藍五十八歲卒。守節三十年。承恩既成立。白於有司。請旌如例。杭人至今稱徐氏兩世遺腹不絕如綫。實有天幸。傳曰。明德之後。必有達人。吾知其嗣之必昌矣。

會稽吳鑑南璜。徵士樸存之子也。少負詩名。力學不倦。乾隆庚辰成進士。榜下授主事。改官四川重慶府通判。殉木果木之難。篋中有黃琢山房集。令家人懷之。脫出曰。我死。弗令此詩失。其同年友畢制府沅。為序而刻之。

汜水縣東南四十里。有山。名曰五雲。高絕千尋。形勢巖嶢。與三峯蘭若東西相峙。中忽聳起。闢一邑旺氣。上有古清涼觀。汜水人士。或讀書其中。每見白雲入戶。因名五雲觀。有浮屠九級。不知建自何代。明宣德中。有雷姓者。利其磳。毀之。以為觀中階基。其中得石徑尺。泐曰逢雷必破。土人神之。至今以塔山名。絕頂有泉。曰野狐竇。水從石罅出。不溢不涸。宛轉層崖怪石間。亦水之奇者。乾隆癸未。挑賈魯河。查探水源得之。

始纂入縣志。

打箭鑪在成都西南九百二十里。相傳蜀漢諸葛武侯南征。遣偏將郭達造箭於此。山脊有郭達廟。極著靈應。土人敬奉維虔。天文分野井鬼之域。為中華之極西。西域之極東。天時多寒少暑。層巒峻嶺。峭壁懸崖。中隔魚通河。形勢險峻。本朝添設軍糧廳。分駐鑪城。專司夷務。兼理五台糧運。明正土司甲克木參同駐於此。轄十二鍋莊。約束新附土司。乾隆丙午。敕建惠遠廟於城西山麓。金碧輝映。光照山谷。番民所居碉樓。亦極宏壯。鑪定橋在飛越嶺西南。六詔孔道。橋跨兩山間。瀘水經其下。不施梁柱。銘鐵鍊為橋。每鍊重二千四百觔。長二十四丈。有奇。闊六丈。以九鍊為橋身。四鍊為護欄。欄穿小鍊。如卍字形。畧鋪薄板。以濟行人。每板離尺許。滿則為狂風鼓蕩。兩崖埋鐵柱四橫木以綰鐵鍊。每柱鑄鍊柱觔重。每柱重四萬八千觔。天全州有王姓者。世業鍛。能懸鑪於鍊。鼓鞀施鎚。名曰飛火。遇有損壞。輒召令興修。他姓不能辦也。

巴塘沃野千里。水泉環繞。日麗風和。豁人心目。物產類中土。西行十里有河曰竹巴龍。即金沙江之上游。北通孔宣土司。南與滇之麗江接壤。有土司二。以轄番衆。前明

授以宣撫司。敕秩二品。長曰阿什錯。副曰阿什滾。曾隨嘉勇公福渡臺。征林爽。屢立戰功。乾隆丙午。臺灣平。論功入奏。賜奇勇巴圖魯名號。以寵榮之。臨陣用鳥鎗。能及遠。二百步內。擊人無不中者。捷如猿猴。所向披靡。夷民懾服。暇則邀漢官大賈。至寨宴飲。度曲。恂恂儒雅。不類夷產。

西藏古曰烏斯藏。即唐古忒。前藏名曰布達拉。距京師萬里。乃坤維極遠之地。天文入井三十度。四時觀北斗。祇見其半。南極出地十六度。唐高宗以宗女文成公主妻其國王。始封為海西郡王。康熙五十九年。平定西藏。敕封康濟鼐為貝勒。阿爾布為貝子。隆布鼐為公。頗羅鼐以軍功疊遷。恩命封至郡王。領藏事。子孫世襲焉。乾隆十五年。謀逆伏誅。藏王之爵遂除。高宗以其地。賜達賴喇嘛管轄。以後藏屬班禪額爾德尼佛管轄。國人酷信佛法。自改封後。頗稱寧謐。班禪住扎什倫布。距前藏一千餘里。乾隆四十五年。入覲。高宗純皇帝賜四體字玉冊玉印。五十九年。仍還扎什倫布駐錫。其地與廓爾喀接壤。故貿易多西洋貨物。行使銀錢。每枚重一錢五分。面鑄乾隆藏寶四字。五十八年。奏准在藏設局鼓鑄。賜名寶藏局。由四川總督派員往董其事。

乾隆四十一年奉 敕撰勝朝殉節諸臣錄十二卷。凡三千六百餘人。分專謚通謚祠祀三等。人各錄其事迹為傳。仰見 聖人之心。大公至正。視天下之善如一。不以異代而歧視也。

乾隆四十三年奉 敕撰西清研譜二十四卷。凡陶之屬六卷。石之屬十五卷。共研二百。為圖四百六十有四。附錄三卷。則今松花紫金駝基紅絲仿製澄泥諸品。共研四十有一。為圖百有八。每研皆正背二圖。亦間及側面。凡 御題及諸家銘識。一一鉤摹精好。自有研譜以來。無如此之全備。

乾隆丁未。庶常散館。欽定賦題太液池人字柳賦。以題為韻。謹按人字柳在太液池。乾隆間。風吹一枝著地。本株傾欹欲倒。命以折枝撐拄。既而成活。與本株作人字形。因以名之。有 御製賦并詩。伏讀 御製句云。借問人稱誰氏依。稀彭澤先生。可想見此柳之風致矣。

陶南村輟耕錄載黑玉酒甕。玉有白章。隨其形刻為魚獸出沒波濤之狀。其大可貯酒三十餘石。徑四尺五寸。高二尺。圓圓一丈五尺。至元二年。告成。敕置廣寒殿。由元迄明。至 本朝垂四百年。此甕委棄人間久矣。乾隆十年。重進於 朝。奉 敕建石

亭於承光殿之南以貯之。御製玉甕歌鐫於甕內。內廷翰林恭和詩甚多。秀水鄭春松虎文詩云。天啟聖瑞玉甕出。惟聖克受昭聲歌。臣愚未親法宮寶。伏讀睿藻心為摹。甕廣三尺容五石。隨形凹凸浮圓荷。刻畫類鑄鼎象物。長風蹴踏萬里波。腥涎怪霧走蛟蜃。呀呷睖眊騰龜鼉。陽冰不治陰火間。怪變滅沒吞江河。伊誰剗削運鬼斧。或巨靈掌吳剛柯。吾思此玉當在璞。塊然萬古藏嵯峨。百靈孕合胚太極。潤及草木輝巖阿。原為聖役剖鑿出。宛轉人世襲白窠。那知德薄不能有。供玩耳目羞姍姍。如延津劍泗水鼎神物。終化理不訖於時恭承。陛下聖。萬方獻瑞聲猗那人無遺賢物鮮棄。希世寶肯終煙蘿。熊能龍氣光燭夜。乃迹而得歸搜羅。轉教內府輸朽貫。千金易致駟馬馱。陳之廣殿重圖訓。真如金甌無傾頗。龍翔鳳翥發天唱。四十八人鳴相和。嗚呼隱見會有過。委棄道院歲已多。冬殖寶腹泥沒足。學士憑弔資吟哦。拂拭偶及光萬國。經天不掩同羲娥。甄幽拔隱寄深慨。誰其會者空摩挲。異物且貴沈奇士。努力盛世無蹉跎。此詩奉勅鐫勒石亭楹柱。

按鄭詩與船舫錄所載廣大容受之

數互異未知孰是存以俟攷

長白祥約圖龜。乾隆丙戌進士。由工部主事累官至布政使。嘗作酒帘詩云。送客船

停楓葉岸。尋春人指杏花樓。都下盛傳。戲呼之曰祥酒窠。

滿洲烈婦希光。吏部尚書協辦大學士永貴之媳。貢外郎伊嵩阿之室也。夫病割股以療。不驗。矢以死從。因女弱無依。恐詔舅姑累。苦守十年。女嫁之次日。賦七言律詩二章見志。自縊死。翁錄其詩奏上。憫之。特予旌。遺稿多有可採。鐵尚書保選入熙朝雅頌集中。凡二十首。其烈婦歎二首。為大學士舒文襄子婦棟鄂氏作。蓋自傷同志也。

長洲黃協周林。事親至孝。母病禱於北斗。願以身代。積四十九日。方假寐。忽聞異香。幡幢蔽空下。中擁神人如世所肖斗母狀。呼其名曰。爾誠孝。奈爾母數盡何。黃搏額哀求。神曰。憐爾孝心。當延爾母數旬壽爾。已而果然。

長洲林煜。奇蕃鍾。少孤嗜學。年十八。補諸生。乾隆戊子。舉於鄉。性愷悌。族人有親死不能斂者。與之錢為具棺木。同年生死遺寡妻。貧且病。貸金周之。交友以急告者。傾囊與之。不足則出所藏卷軸。使質錢為用。久而不歸。亦未嘗往索也。與人同行。人指所識妓門曰。吾故人家也。牽之入。見粉黛者。覺其絳。輒引去。或招飲於舟。酒半。呼妓至。則辭以溲。登岸脫歸。其任卹猥潔如此。後謁選得教諭。年三十九卒。長子行潮。敦

行力學如其父甫得一矜遽嬰廢疾以卒年僅二十六天之所以待端人者顧若是

按林君次子行原遂於古文卓然可傳行潮之子弁稱少年英雋今俱為邑中名諸生其所成就正未可量然則彼蒼所屬或在此不在彼耳

吳縣顧童子年九歲遭母病且殆藥不效童子寤從鄰家賃雞髮刀歸止戶外熱火煮湯持刀割肱肉投鏹中會母呼湯傾盞中以進母飲之病良已童子袖間血漉漉出恬然無所苦母病起童子創亦合上海曹御史鴻書為之記

趙雲松翼末第時其戚張某為女鬼所祟醫禱罔效趙往省之坐其榻上張恍惚聞小語曰趙探花至矣姑避之及趙出案如故張家苦求趙襪被宿其處旬日頗安趙歸家崇大作而張竟不起趙登乾隆辛巳一甲三名官至迤西道

吳縣諸生陳和叔黃中少通敏長於史學深究前代治亂往復所由以達於當世之務發為文磊落不可控制乾隆丙辰應博學鴻詞科廷試未取客游燕楚齊豫閩

浙間時高宗純皇帝登極之初中外大臣仰承聖意延致天下豪俊虛衷諮訪

和叔故善海寧陳相國因上書論用人理財治兵三大事其條用人之目有十曰分科取人曰慎擇舉主曰重名節曰辨邪正曰加俸曰汰冗員曰寬法網曰覈名實曰懲貪曰酌道里以銓選條理財之目有六曰定旂制曰權錢幣曰興西北水利曰輕

征權曰減漕粟曰定鹽政條治兵之目有六曰謹邊防曰嚴海禁曰練土兵曰修車
器曰簡帥臣曰加月餉相國聽其言會詔求骨鯁質朴之士相國欲舉之和叔辭
已而倦游歸里下帷著書成宋史藁一百七十卷又著新唐書刊誤國朝謚法考
殿閣部院年表督撫年表十餘卷詩文集四卷貧不能付梓年五十九卒不能治喪
具親友以金購柩妻張固卻之曰奈何以貧故傷夫子義遂粥居以葬其展氏之風
歟

熙朝新語卷十三終

熙朝新語卷十四

清 吳郡徐錫齡厚卿輯

乾隆十六年三月初十日奉 上諭朕時巡至杭州。禹陵在望。緬惟平成之德。萬世永賴。皇祖聖祖仁皇帝曾親祀焉。爰東渡浙江。涉會稽。式遵 皇祖舊典。躬薦馨於宇下。厥有妣氏子姓。世居陵側。應世予八品官奉祀。該督撫擇其有品行者一人充之。以昭崇德報功之至意。欽此。欽遵。由閣部移咨督撫。行據司府縣結報詳題。請將妣恒甸世襲八品官奉祀等因。到部具題。奉 旨准行。

乾隆二十二年二月二十八日奉 上諭朕昨至浙江省城。禮部未奏請遣祭已故大學士徐本。詢其故。則以未入賢良祠。例不致祭為對。徐本歷事 兩朝。宣力多年。勤慎懋著。即如前者過常州時。已故巡撫潘思渠。禮部尚猶奏請。徐本視潘思渠為何如耶。朕巡幸所經。郡縣名臣舊輔。皆即致祭。乃國家念舊酬功之典。該部自當慎重辦理。何得膠柱鼓瑟。乃爾。徐本著入本省賢良祠。並著該部奏請遣官致祭。欽此。仰見 國家眷念舊臣。有加無已之至意。凡在臣工。宜如何感激奮興耶。

乾隆十六年。聖駕南巡。進治河方畧之生員俞堉。賞緞一疋。貂皮二張。大荷包

一對。進詩賦之吳楷。顧于觀。姜掄。元王。地球。于堯臣。各賞緞一疋。大荷包一對。其餘王新銘等十五人。各賞大荷包一對。原任太僕寺卿張映辰。編修梁啟心。各賞緞一疋。貂皮二張。續進詩賦之魏近思等二十名。各賞緞一疋。荷包一對。嚴長明等五十二名。各賞荷包一對。二十二年。聖駕南巡。進獻詩賦書畫人員。進一冊者。賞緞一疋。進二冊者。賞緞二疋。其進萬壽生生圖之羅學旦。進蘇詩補註之查開。各賞緞四疋。二十七年。聖駕南巡。進獻詩冊之胡紹鼎。李宗袁。王誠。吳燦英。各賞大荷包一對。小荷包二個。進獻黃山圖之員外郎許蔭材。進獻龍井見聞錄之舉人汪孟鉞。各賞緞二疋。進獻畫冊之監生朱方鵠。童生呂師說。言世永。各賞緞一疋。進獻唐詩之李清馥。賞緞二疋。三十年。聖駕南巡。進獻詩賦之湯世昌等三十人。各賞緞一疋。承辦金山墨刻之程堂。姚思康。各賞緞二疋。江廣達。賞貂皮四張。大小荷包各一對。以上俱見。南巡盛典。後自庚子至甲辰。鑾輅經臨。行慶施惠。不勝殫述。

乾隆二十七年。李鶴峯因培督學江蘇。按試淮郡。方唱名時。地忽震。西風大作。轅門外旗竿。被風刮入雲中。不知所往。時河湖盛漲。水與高家堰平。西風加勁。淮揚危在